

四庫全書

集部

欽定四庫全書

文選補遺卷三十八

元 陳仁子 輯

贊

贊者讚也  
頌之異名

燕世家贊

愚曰姬姓後亡惟燕召公其醫家所謂  
延羸壽考歟是可觀所養矣勢固不必

強也

司馬遷

下至相如  
贊並同

召公奭可謂仁矣甘棠且思之況其人乎燕北迫蠻貉

內措齊晉

索隱曰措交雜也又作錯劉氏云爭錯也

崎嶇疆國之間最為弱

小幾滅者數矣然社稷血食者八九百歲於姬姓獨後亡豈非召公之烈邪

韓世家贊

愚曰是可為存孤者勸

韓厥之感晉景公紹趙孤之子武以成程嬰公孫杵臼之義此天下之陰德也韓氏之功於晉未覩其大者也然與趙魏終為諸侯十餘世宜乎哉

孔子世家贊

愚曰居今日而贊孔氏夫何言哉以六家並論之史遷似亦溺於流俗者

而能尊孔子於世家置老子於列傳其見不卓乎先黃老後六經意者固之論特以時好觀遷耳史

詩有之高山仰止景行行止雖不能至然心鄉往之余讀孔氏書想見其為人適魯觀仲尼廟堂車服禮器諸生以時習禮其家余低回留之不能去云天下君王至于賢人衆矣當時則榮沒則已焉孔子布衣傳十餘世學者宗之自天子王侯中國言六藝者折中於夫子可謂至聖矣

張良世家贊

愚曰始以天斷見漢之締綰也不偶終以貌論見高帝之用人也不錯

學者多言無鬼神然言有物

物謂精怪反藥物也

至如留侯所見

老父予書亦可怪矣

索隱曰詩緯云風后黃帝師又化為老子以書授張良亦異說耳父

後化為黃石

高祖離困者數矣而留侯常有功力焉豈可謂

非天乎上曰夫運籌策帷帳之中決勝千里之外吾不如

子房余以為其人計魁梧竒偉

梧音悟魁梧丘虛壯大之意

至見其

圖狀貌如婦人好女蓋孔子曰以貌取人失之子羽

澹臺

滅明也狀貌甚惡

留侯亦云

五宗世家贊

景帝子十四人一武帝餘十三人為王漢書謂之景十三王而此名五宗

者其母五人同母者為宗也○景帝之待五宗  
削其恩數者乃全之也於是可見漢初之無制  
矣

高祖時諸侯皆賦

國所出有皆入於王

得自除內史以下漢獨為

置丞相黃金印諸侯自除御史廷尉正博士擬於天子

自吳楚反後五宗王世漢為置二千石去丞相曰相銀

印諸侯獨得食租稅奪之權其後諸侯貧者或乘牛車

也

申韓傳贊

愚曰論申韓之慘而歸之老子遷之論確矣而世乃議之曰先黃老焉何邪

老子所貴道虛無因應變化於無為故著書辭稱微妙

難識莊子散道德放論要亦歸之自然申子卑卑

自勉勵之

意施之於名實韓子引繩墨切事情明是非其極慘礫

胡革反用法慘急而鞠礫深刻

少思皆原於道德之意而老子深遠矣

張儀傳贊

愚曰秦已死矣而儀且暴其短其不怨也可畏哉且史遷直謂當時事之相類

者率附之秦未必非儀實為之

三晉多權變之士夫言從衡彊秦者大抵皆三晉之人

也夫張儀之行事甚於蘇秦然世惡蘇秦者以其先死

而儀振暴其短以扶其說

暴音步卜反振謂振揚而暴露其短扶謂說彼之非成我

之是扶會已之說詞也

成其衡道要之此兩人真傾危之士哉

穰侯傳贊

愚曰苟為人所間而欲奪其位國戚羈旅一也何必范雎之於魏冉乎

穰侯昭王親舅也而秦所以東益地弱諸侯嘗稱帝於天下天下皆西鄉稽首者穰侯之功也及其貴極富溢一夫開說身折勢奪而以憂死況於羈旅之臣乎

孟嘗君傳贊

愚曰客之稱四海一君之世無是也故在春秋時百里奚虞人也而客於



秦苗賁皇楚人也而客於晉藥盈之去晉而客也為晉之憂子胥之去楚而客也為楚之患大抵皆客也浸淫至戰國談天雕龍蜂起泉湧猶空言爾儀秦以從橫為劔佩其禍生民何限哉而四公子之徒直以取數之多爭為雄長要其所得不過雞鳴狗盜之輩爾夫何益於大故乎誠使當時之客如孟氏焉在梁曰仁義在齊又曰仁義執吾之正論以活天下則四公子之禮遇不為虛設其亦庶乎有補也而奈之何其不然也是以史遷於田文也斷之曰自喜夫固斥其為一己之私好非天下之公好焉耳然則客之為禍他日浸浸不已非田文之徒實漲其波而誰哉至若秦皇之興以囊括四海包舉宇宙之志非戰國角立比也而猶曰逐客不知是客也將何歸乎是必如晉之范粲寢所乘車足不履地乃可良用一慨

吾嘗過薛其俗閭里率多暴桀子弟與鄒魯殊問其故  
曰孟嘗君招致天下任俠姦人入薛中蓋六萬餘家矣  
世之傳孟嘗君好客自喜名不虛矣

季布樂布傳贊

愚曰一則不輕死一則不顧死要  
皆畧有見於義者而遷且謂賤妄

感慨自殺非能勇也計盡無復之者乃  
借以自述其隱忍苟活以成史書之意

以項羽之氣而季布以勇顯於楚身履典軍

屣履蹈也  
又曰數也

搴旗者數矣可謂壯士然至被刑戮為人奴而不死何其  
下也彼必自負其材故受辱而不羞欲有所用其未足

也故終為漢名將賢者誠重其死夫婢妾賤人感慨而  
自殺者非能勇也其計畫無復之耳縻布哭彭越趣湯  
如歸者彼誠知所處不自重其死雖往古烈士何以加  
哉

竇嬰田蚡灌夫傳贊

愚曰竇嬰失勢而灌夫與之  
如故真義士也田蚡恃勢不

特陷夫併  
陷嬰忍哉

魏其武安皆以外戚重灌夫用一時決策而名顯魏其  
之舉以吳楚武安之貴在日月之際然魏其誠不知時

變灌夫無術而不遜兩人相翼乃成禍亂武安負貴而好權杯酒責望陷彼兩賢嗚呼哀哉遷怒及人命亦不延衆庶不載竟被惡言嗚呼哀哉禍所從來矣

匈奴傳贊

愚曰遷之贊此也以定哀之時自比而獨責將帥焉夫豈獨責將帥哉

孔子著春秋隱桓之間則章至定哀之際則微

仲尼仕於定哀

故其著春秋不切論當世而微其詞

為其切當世之文而罔襲忌諱之辭

也

罔者無也謂其無實而襲之是也

世俗之言匈奴者患其徼一時之

權

徼音皎

而務調納其說

音稅

以便偏指不參

謂稅者謀匈奴皆患其直

徵求一時權幸但務諂進其說以彼已將率已去  
自便其偏指不參詳終始利害也  
席中

國廣大氣奮人主因以決策是以建功不深堯雖賢興

事業不成得禹而九州寧

正義曰言堯雖賢聖不能獨理得禹而九州安寧以刺武

帝不能擇賢將相而務諂納小人浮說多伐匈奴故且壞齊民太史公引禹聖成其太平以攻當代之罪

欲興聖統唯在擇任將相哉

大將軍青傳贊

愚曰賓客之害吾於史遷贊孟嘗又於第五倫彈竇氏一再言之矣特孟

嘗之時天下分裂猶不足責也竇氏立清朝植私黨大可罪矣若夫以大將軍之勢誰能禦之而能以嬰蚡之賓客為憊亦可謂善處盛强者然且未也黠為揖客大將軍尤賢之殆非純

以客為賤者客固有賢不賢也乃若宰相之職則又不然要當如狄梁公之藥籠呂正獻之夾袋不為私門植桃李而為國家收拾人才殆又不可以青藉口

蘇建語余曰吾嘗責大將軍至尊重而天下之賢大夫毋稱焉願將軍觀古名將所招選擇賢者勉之哉大將軍謝曰自魏其武安之厚賓客天子常切齒彼親附士大夫招賢絀不肖者人主之柄也人臣奉法遵職而已何與預招士驃騎亦放此意其為將如此

### 西南夷傳贊

楚之先豈有天祿哉在周為文王師封楚及周之衰地稱五千里秦滅諸侯唯楚苗裔尚有滇王漢誅西南夷國多滅矣唯滇復為寵王然南夷之端見枸醬番禺大

夏杖印竹西夷後揃剽分二方

揃音翦謂被分割也剽言西夷後被揃剽遂剽

居西南二方各屬郡縣剽亦分義

卒為七郡

捷為牂牁越嵩益州武都沈犂汶山地

滑稽傳贊

愚曰直載其事談言微中之驗也

淳于髡仰天大笑齊威王橫行優孟搖頭而歌負薪者以封優旃臨檻疾呼陞楯得以半更豈不亦偉哉

項羽傳贊

愚曰觀此贊成敗之分  
智力之不如名義決矣

吾聞之周生曰

周生漢人也

舜目蓋重瞳子又聞項羽亦重

瞳子羽豈其苗裔邪何興之暴也夫秦失其政陳涉首  
難豪傑蜂起相與並爭不可勝數然羽非有尺寸乘勢

起隴畝之中三年遂將五諸侯滅秦

此時山東六國而  
齊趙韓魏燕五國

並起從伐秦  
故云五諸侯

分裂天下而封王侯政由羽出號為霸王

位雖不終近古以來未嘗有也及羽背關懷楚放逐義  
帝而自立怨王侯叛已難矣自矜功伐奮其私智而不



師古謂霸王之業欲以力征經營天下五年卒亡其國  
身死東城尚不覺寤而不自責過矣乃引天亡我非用  
兵之罪也豈不謬哉

屈原賈生傳贊

愚曰爽然自失之語還其於復  
任安一書至此乃有悟處乎

余讀離騷天問招魂哀郢悲其志適長沙觀屈原所自

沈澗

荆州記云長沙羅縣北帶汨水去  
縣四十里是原自沈處北岸有廟

未嘗不垂涕想

見其為人及見賈生弔之又怪屈原以彼其材游諸侯  
何國不容而自令若是讀鵬鳥賦同死生輕去就又爽

爽一作

然自失矣

韓信傳贊

韓信盧綰非素積德累善之世徵一時權變以詐力成  
功遭漢初定故得列地南面稱孤內見疑彊大外倚蠻  
貊以為援是以日疏自危事窮智困卒赴匈奴豈不哀  
哉陳絺梁人其少時數稱慕魏公子及將軍守邊招致  
賓客而下士名聲過實周昌疑之疵瑕頗起懼禍及身  
邪人進說遂陷無道於戲悲夫夫計之生孰成敗於人

也深矣

李廣傳贊

愚曰廣之數奇而忠信見於身後夫何憾者

傳曰其身正不令而行其身不正雖令不從其李將軍之謂也余覩李將軍悛悛如鄙人口不能道辭及死之日天下知與不知皆為盡哀彼其忠實心誠信於士大夫也諺曰桃李不言下自成蹊此言雖小可以諭大也

司馬相如傳贊

愚曰相如在當時欲以節儉之說進自是齟齬其虛詞濫說乃巽入

也

春秋推見至隱

若晉文召天子經言狩河陽若隱公見穀而經不書易本隱之以

顯

是推見至隱也易以天道按人事索隱以之明顯也

大雅言王公大人而德逮

黎庶

文王公劉在位大

小雅譏小已之得失其流及上

先道已之憂苦其流乃及上政之得失

所以言雖外殊其合德一也相如

雖多虛辭濫說然其要歸引之節儉此與詩之風諫何異揚雄以為靡麗之賦勸百風一猶馳騁鄭衛之聲曲終而奏雅不已虧乎余采其語可論者著于篇

大鵬贊

愚曰修本性不願富貴此贊也母乃見知於王敦故可止則止歟

阮修

蒼蒼大鵬誕自北溟假精靈鱗神化以生如雲之翼如  
山之形海運水擊扶搖上征翕然增舉背負太清志存  
天池不屑唐庭鸞鳩仰笑尺鷃所輕超世高遊莫知其  
情

夷齊

東坡曰讀史述九章夷齊箕子皆有感而云  
去之數百餘載吾猶識其意也。愚曰意在

草命窮

居二句

陶淵明

以下述史  
九章並同

二子讓國相將海隅天人革命絕景窮居采薇高歌慨  
想黃虞貞風凌俗爰感懦夫

箕子

愚曰觸物皆非  
四字寫得悵然

去鄉之感猶有遲遲矧伊代謝觸物皆非哀哀箕子云  
胡能夷狡童之歌悵矣其悲

管鮑

愚曰淵明方外之  
友殆賢於管鮑者

知人未易相知實難淡美初交利乖歲寒管生稱心鮑  
叔必安奇情雙亮令名俱完

程杵

愚曰淵明直不遇此耳處之更別

遺生良難士為知己忘義如歸允伊二子程生揮劍懼  
茲餘恥令德永聞百代見紀

七十二弟子

愚曰回賜之評前此所無

恂恂舞雩莫曰匪賢俱映日月共飡至言慟由才難感  
為情牽回也早天賜獨長年

屈賈

愚曰如彼稷契誰不願之淵明豈忘世者

進德脩業將以及時如彼稷契孰不願之嗟乎二賢逢

世多疑侯詹寫志感鵬獻辭

韓非

愚曰此非惜韓非也以見白首抱關之為高耳

豐狐隱穴以文自殘君子失時白首抱關巧行居災忤  
辯召患哀矣韓生竟死說難

魯二儒

愚曰特為貞夫一語其不滿於時人也蓋深


易代隨時迷變則愚介介若人特為貞夫德不百年汙  
我詩書逝然不顧被褐幽居

張長公

愚曰其以長公自況歟



遠哉長公蕭然何事世路多端皆為我異斂轡竭來獨  
養其志寢迹窮年誰知斯意



文選補遺卷三十八

欽定四庫全書

集部

文選補遺卷

三十九

詳校官中書

臣

丁榮祚

助教

臣

常循覆勘

總校官中書

臣朱

銓

校對官編修

臣許

烺

謄錄監生

臣

雷在瓊

欽定四庫全書

文選補遺卷三十九

元 陳仁子 輯

誄

愚曰古人辭簡而情真後人辭詳而情未必真哀公誄孔子止十六字悲情可掬今數百言而情何

如馬

曹蒼舒誄

魏文帝

魏志鄧哀王字蒼舒少聰察岐嶷生五六歲智意所及有若成人建安十三年

疾病太祖親為請命及亡哀甚言則流涕為聘甄氏亡女合葬文帝誄云

維建安十有三年五月甲戌童子曹蒼舒卒嗚呼哀哉  
乃作誄曰

於維允升懿矣純良誕豐令質荷天之光旣哲且徂爰  
柔克剛彼德之容茲義聿行猗歟那歟終然允臧宜逢  
介祉以永無疆如何昊天彫斯俊英嗚呼哀哉惟人之  
生忽若朝露役役百年亶亶行暮矧爾夙天十三而卒

何辜於天景命不遂兼悲憎傷侘

玉篇都嫁丑家  
二切侘條也

條

玉篇

敕厲子例二切楚詞曰怵鬱  
邑余侘條兮侘條失志兒

失氣永思長懷哀爾罔極

貽爾良妃襚爾嘉服越以丁酉宅彼城隅層丘峨峨寢  
廟渠渠姻媾雲會充路盈衢悠悠羣司岌岌其車傾都  
蕩邑爰迄爾居魂而有靈庶可以娛嗚呼哀哉

任城王誄

曹植

昔二號佐文旦爽翼武於休我王魏之元輔將崇懿迹  
等號齊魯如何奄忽命不是與仁者悼沒兼彼殊類矧  
我同生能不惜阻目想官塋心在平素髣髴魂神馳情

陵墓凡夫愛命達者徇名王雖薨徂功著丹青人誰不  
沒德貴有遺乃作誄曰

幼有令質光耀珪璋孝殊閔氏義達參商溫溫其恭爰  
柔克剛心存建業王室是匡矯矯元戎雷動雨徂橫行  
燕氏威懾北胡奔虜無竄還戰高柳王率壯士常為君  
首宜究長年永保皇家如何奄忽景命不遐同盟飲淚  
百寮咨嗟

卞太后誄

曹植

率土噴薄三光改度陵顏谷踊五行牙錯皇室蕭條羽  
檄四布百姓歛歛嬰兒號慕若喪考妣天下縞素聖者  
知命徇道寶名義之攸在亦棄厥生敢揚后德表之旒  
旌光垂罔極以慰我情乃作誄曰

我王之生坤靈是輔作合于魏亦光聖代篤生帝文紹  
虞之緒龍飛紫宸奄有九土詳惟聖善岐嶷秀出德配  
姜嫄不忝先哲玄覽萬機兼才備藝汎納容衆含垢藏

疾仰奉諸姑降接傳列陰陽觀潛外明內察及踐大位  
母養萬國溫溫其人不替明德悼彼邊氓未遑宴息恒  
勞庶事兢兢翼翼親桑蠶館為天下式樊姬霸楚書載  
其庸武王有亂孔歎其功我后齊聖克暢丹聰不出房  
闈心照萬邦年踰耳順乾乾匪倦珠玉不玩躬御綈練  
日昃忘饑臨樂勿讌去奢即儉曠世作檢慎終如始蹈  
和履貞恭俟神祇昭奉百靈跼天躋地祇畏神明敬微  
慎獨報禮幽冥虔肅宗廟蠲薦三牲降福無疆祝云其



神宜享斯祐蒙祉自天何圖凶咎不免斯年嘗禱盡禮  
有篤無痊豈命有終神食其言遺孤在疚承諱東藩擗  
踊郊畛洒淚中原追號皇妣棄我何遷昔垂顧復今何  
不然空宮寥廓棟宇無煙巡省階塗髣髴樞軒仰瞻帷  
幄俯察几筵物不毀故而人不存痛莫酷斯彼蒼者天  
遂臻魏都遊魂舊邑大隧開塗靈羽斯戢歎息霧興揮  
淚雨集徘徊輻輳號咷莫及神光既幽佇立以泣

吳故丞相陸公誄

陸雲

惟赤烏八年二月乙卯吳故使持節郢州牧左都護丞相江陵邵侯陸公薨嗚呼哀哉皇期迭紹成命昊天聖王作矣世有哲臣觀監在吳乃降其人思皇我后應運對揚穎秀崇華景逸扶桑龍輝襲極鳳鳴玉堂舉旗清阻奮鉞夷荒悠結沈維峻極公綱將撫遠績括地九圍皇淳爽泰遺音播徽取揚元勲表之素旂乃作誄曰  
濬哲我祖時文俊德玄粹納真清休載式本承慶輝駿

惠罔極申錫多祉本枝千億芳條遠蔭靈根茂植根條  
伊何苗黃裔舜長發有祥貽我祚胤神明之緒實蕃瓊  
俊和音嗣世不替碩彥明監在下降命上玄我公初載  
天嘏之純重光納照旋機授銓仰儀喬岳俯濯洪川清  
耀秀穎雲翹映辰肇彼岐嶷允迪天真先心則智率意  
斯仁秉彜清昧體靈協神神休載鑠九德兼和景峻凌  
高立源湧波光備既淳逸軌爰超閼網包荒景靈渥耀  
山林岳秀天光乃照恢淵博量騰險陵邵厥初藏器栖

蟠海岳披藻崑崙濯秀陽谷含章在淵發揮龍躍時服  
陽九承乾之衰有皇于升王軒徘徊爰茲赫弈需期雲  
飛天步皇輿載見紫微華堂誕基委蛇自階鼎輝既濟  
嘉命乃集和羹未飪宰物下邑康年屢登惠風時協在  
斷無頗于教斯輯金虎覲精戎車孔肆神寶播越天人  
釋位有命在茲帝思元帥委弁總干鷹揚振翼虎噬桓  
桓威靈既授六軍有序乃誓我衆乃整我旅神干山立  
雄旗電舉懸旌肥陽即戎江許我后日敬上帝臨余靖

共夙夜匪寧匪處乃幹中軍入作內輔公侯陟降在帝  
左右闢雨滔天作雲西上帝曰將軍救爾羆虎赫赫明  
明皇輿出祖龍舟照淵旂旒映野鋪敦江濱仍執醜虜  
荆南既集方險未夷天子命我撫之西垂公侯戾止威  
神緝熙虔劉作虐思輯子來妖旂北靡寡爾雄旗獷彼  
羣蠻祁祁遺黎柔遠能和薄言綏之方言肅清烈文雋  
武舍爵明堂冊勲天府天子曰咨我圖乃功錫爾青土  
建侯于東開國名墟光宅海邦分圭作寶軒路以庸既

受帝祐公用加大駟鐵孔阜元戎沓謁淑旂飛藻綬章  
承蓋劉王負險寇我西鄰公侯赫怒干戈啓陳金鉞鏡日  
雲旗絳天凌網襄岳沈維括淵戎漠時殪方域清塵元  
王隕難鯨鯢墜鱗曹休東踰我疆西越帝簡厥佐將命  
其傑乃俾我公啓行警伐江漢之潁天子授鉞桓桓神  
誅震驚魏方我公矯矯虎視元戎殲彼醜旅效此武功  
武功既彰天威薄曜靈武震華邊陲清暴振旅凱入王  
假有廟假廟伊何本庸寵祚土田陪敦四牡載路出餞

于郊此惟予顧禮嘉嵩高樂和湛露改容肅至傾蓋寵  
步輦帶翩紛珍裘阿那區宇惟寧繁遏帝祉繡裳縟藻  
袞帶重紫遂虛上司命公登宰帝曰丞相朕嘉若德以  
茲軒冕往踐乃職宣爾審心惟皇協極邦國若否四方  
爾式公拜稽首欽翼明聖乃御璣衡仰徽七政重輝熾  
景協風烟煜百神秩祀兆庶思淳克諧庶尹遂成帝勲  
時雍旣濟王途克廣茂德栖音廣問沈響靈澤崇數天  
險垂陰思豐丘泉潤博雲林遭世大過夷倫靡肅疊疊

公侯思維雅俗發慎我衣永言禮樂被介敦化荷戈思  
學五品時訓民神攸鑠我有煥文如曜如辰何以崇之  
匪闡伊人我有烈武如雷如霆何以將之保大豐年祉  
祚勿引早世幽神仰慕遺輝寤寐憂殷嗚呼哀哉永惟  
我公克明德心窈藹芳和被之惠林公侯歿矣誰嗣徽  
音名存體逝德茂形潛民秉之思好是謳吟嗚呼哀哉  
惟帝念功寵命光大考謚典謨崇榮協泰安宮載考我  
公于邁輻軒啓塗先驅警旆哀風結輿遺恩憑蓋舍此



休明即此重昧攀慕靡及永戀光大

武元楊皇后誄

左貴嬪

晉書諱芬左思之妹少好學善綴文名亞於思文帝聞而納之

惟泰始十年秋七月丙寅晉元皇后楊氏崩嗚呼哀哉  
昔有莘適殷姜妣歸周宣德中闡徽音永流樊衛二姬  
匡齊翼楚馬鄧兩妃亦毗漢主峨峨元后光嬪晉宇伉  
儷聖皇比蹤往古遭命不永背陽即陰六宮號咷四海  
慟心嗟余鄙妾銜恩特深追慕三良甘心自沈何用存



思不忘德音何用紀述託辭翰林乃作誄曰

赫赫元后出自有楊弈世朱輪耀彼華陽惟嶽降神顯  
茲禎祥篤生英媛休有烈光合靈握文異于庶姜和暢  
春日操厲秋霜疾彼攸遂敦此義方率由四教匪怠匪  
荒行周六親徽音顯揚顯揚伊何京室是臧乃聘乃納  
聿嬪聖皇正位閨闕惟德是將鳴珮有節發言有章仰  
觀列圖俯覽篇籍顧問女史咨詢竹帛思媚皇姑虔恭  
朝夕允釐中饋執事有恪于禮斯勞于敬斯勤雖曰齊

聖邁德日新日新伊何克廣弘仁終溫且惠帝妹是親  
經緯六宮罔不彌綸羣妾惟仰譬彼北辰亦既青陽鳴  
鳩告時躬執桑曲率導媵姬脩成蠶族分繭理絲女工  
是察祭服是治祇奉宗廟永言孝思于彼六行靡不蹈  
之皇英佐舜塗山翼禹惟衛惟樊二霸是輔明明我后  
異世同矩亦能有亂謀及天府內敷陰教外毗陽化綢  
繆庶正密勿夙夜思從風翔澤隨雨播中外禔福遐邇  
詠歌天祚貞吉克昌克繁則百斯慶育聖育賢教踰姪

如訓邁姜嫄堂堂太子惟國之元濟濟南陽為屏為藩  
本枝罨藹四海蔭焉微斯皇妣孰茲克臻曰乾蓋聰曰  
聖允誠積善之堂五福所并宜享高年匪隕匪傾如彭  
之齒如聃之齡云乎不造于茲禍殃寢疾彌留寤寐不  
康巫咸騁術和鵲奏方祈禱無應嘗藥無良形神將離  
載昏載載荒奄忽崩殂湮精滅光哀哀太子南陽繁昌攀  
援不寐擗踊摧傷嗚呼哀哉闔宮號咷宇內震驚奔者  
填衢赴者塞庭哀慟雷駭流淚雨零歔歔不已若喪所

生惟帝與后契濶在昔比翼白屋雙飛紫閣悼后傷后  
早即窀穸言斯旣及涕泗隕落追惟我后寔聰寔哲通  
于性命達于儉節送終之禮比素上世祔無珍寶哈無  
明月潛輝梓宮永背昭晰臣妾哀號同此斷絕庭宇遏  
密幽室增陰空設幃帳虛置衣衾人亦有言神道難尋  
悠悠精爽豈浮豈沈豐奠日陳冀魂之臨孰云元后不  
聞其音乃議景行景行已溢乃考龜筮龜筮襲吉爰定  
宅兆克成玄室魂之往矣于以今日仲秋之晨啓明始

出星陳夙駕靈輿結駟其輿伊何金根玉箱其駟伊何  
二駟雙黃習習容車朱服丹章隱隱轎軒弁綰總裳華  
轂曜野素蓋被原方相伉伉旌旄翻翻輓童引歌白驥  
鳴轅觀者夾塗士女涕漣千乘萬騎迄彼峻山峻山峨  
峨曾阜重阿弘高顯敞據洛背河左瞻皇姑右睇帝家  
推存揆亡明神所嘉諸姑姊妹娣姒媵御追送塵軌號  
咷衢路王侯卿士雲會星布羣官庶僚縞蓋無數咨嗟  
通夜東方云曙百祇奉迎我后安厝中外俱臨同哀並

慕涕如連雲淚如湛露局閼既闔窈窕冥冥有夜無晝  
曷用其明不封不樹山坂同形昔后之崩大火西流寒  
往暑過今亦孟秋自我銜卹倏忽一周衣服將變痛心  
若抽逼彼禮制惟以增憂去此素衣結戀靈丘有始有  
終天地之經自非三光誰能不零存播令德沒圖丹青  
先哲之志以此為榮溫溫元后寔宣慈焉撫育羣生恩  
惠滋焉遺愛不已永見思焉懸名日月垂萬春焉嗚呼  
庶妾感四時焉言思言慕涕連洒焉

哀策文

晉文明王皇后哀策文

晉武帝

四年后崩時年五十二合葬崇陽陵將遷祔帝手疏后德行命史官為哀策曰

明明先后興我晉道暉章淑問以翼皇考邁德宣猷大業有造貽慶孤矇堂構是保庶資復顧永享難老奄然登遐棄我何早沈哀罔訴如何穹昊嗚呼哀哉厥初生民樹之惠康帝遷明德顧予先皇天立厥配我皇是光作邦作對德音無疆愍予不弔天篤降殃日沒明夷中



年隕喪熒熒在疚永懷摧傷尋惟景行於穆不已海岱  
降靈世荷繁祉永錫祚胤篤生文母誕膺純和淑慎容  
止質直不渝體茲孝友詩書是悅禮籍是紀三從無違  
中饋允理追惟先后勞謙是尚爰初在室竭力致養嬪  
于大邦皇基是相謚靜隆化帝業以創內叙嬪御外協  
時望履信居順德行洽暢密勿無荒劬勞克訓崇儉抑  
華冲素是放雖享崇高歡加未饗胡寧棄之我將曷仰  
咨余不造大罰薦臻皇考背世始踰三年仰奉慈親冀

無後艱凶災仍集何辜于天嗚呼哀哉靈輜夙駕設祖  
中闈輻輳動軫既往不追哀哀皇妣永潛靈暉進攀梓  
宮顧援素旂屏營窮痛誰告誰依訴情贈策以舒傷悲  
尚或有聞顧予孤遺嗚呼哀哉

晉武元楊皇后哀策文

晉武帝

晉后妃傳有司卜吉窀穸有期  
乃命史臣作哀策叙懷其詞曰

天地配序成化兩儀王假有家道在伉儷姜嫄佐譽一  
妃為媯仰希古昔冀亦同規今胡不然景命夙虧嗚呼

哀哉我應圖籙臨統萬方正位于內寔在嬪嬙天作之  
合駿發之祥河嶽降靈啓祚華陽奕世豐衍朱紉斯煌  
纘女惟行受命溥將來翼家邦憲度是常緝熙陰教德  
聲顯揚昔我先妣暉曜休光后承前訓奉述遺芳宜嗣  
徽音繼序無荒如何不弔背世隕喪望齊無主長去蒸  
嘗追懷永悼率土摧傷嗚呼哀哉陵兆旣窆將遷幽都  
宵陳夙駕元妃其祖宮闈遏密階庭空虛設祖布紉告  
駕啓塗服輦褕狄寄象容車金路晻藹裳帳不舒千乘

動軫六驥躊躇銘旌樹表翬柳雲敷祁祁同軌岌岌蒸  
徒孰不云懷哀感萬夫寧神虞卜安體玄廬土房陶簋  
齊制遂初依行紀謚聲被八區雖背明光亦歸皇姑沒  
而不朽世德作謨嗚呼哀哉

昭明太子哀策文

梁王均

蜃輅戕戕龍驂跼步羽翹前驅雲旗比儔皇帝哀繼明  
之寢曜痛嗣德之徂芳御武帳而悽慟臨甲觀而增傷

式稽令典載揚鴻烈詔撰德於銘旌永傳徽於舞綴其  
辭曰

式載明兩實惟少陽儀天比峻儷景騰光睿哲膺期旦  
暮斯在識洞機深量包瀛海立德不器至功弗宰寬綽  
居心溫恭成性修襟孝友率由嚴敬咸有種德惠和齊  
聖括囊流略包舉藝文徧該絃素殫極丘墳騰褰充積  
儒墨區分瞻河闡訓望魯揚芬雲物告徵袞沴褰象星  
靈恒曜山頽朽壤威儀上賓德音長往具僚無蔭詒承

安仰嗚呼哀哉首夏司開麥秋紀節容衛徒警青華萎  
絕書幌空張談筵罷設虛饋饒饒孤燈翳翳嗚呼哀哉  
簡辰請日筮合龜貞幽埏夙啓玄宮獻成武祔齊列文  
物增明昔遊漳水賓從無聲今歸郊郭徒御相驚嗚呼  
哀哉背絳闕以遠徂輔青門而徐轉顧馳道而詎前望  
國都而不踐渡脩坂之威夷邈平原之悠緬驥蹠足以  
酸嘶挽悽鏘而流泣嗚呼哀哉混哀音於蕭籟變愁容  
於天日雖草木之森陰乃寒林之蕭瑟旣將反而復疑

如有求而遂失謂天地其無心遽永潛於哀質嗚呼哀哉

哀辭

金瓠哀辭

曹植

金瓠余之首女雖未能言固已授色知心矣生十九旬而夭折乃作辭曰

在襁褓而撫育向孩笑而未言不終年而夭絕何負罰

於皇天信吾罪之所招悲弱子之無讐去父母之懷抱  
滅微骸於糞土天長地久人生幾時先後無覺促爾有  
期

仲雍哀辭

曹植

曹楷字仲雍魏太子之中子也三月而生五月而亡昔  
后稷之在寒冰鬪穀之在楚澤咸依鳥憑虎而無風塵  
之災今之玄弟文茵無寒冰之慘羅幃綺帳暖於翔鳥



之翼幽房閑宇密於雲夢之野慈母良保仁乎鳥虎之  
情卒不能延期於暮載雖六旬而天歿彼孤蘭之眇眇  
亮成幹其畢榮哀綿綿之弱子早背世而潛形且四孟  
之未周將願闕乎一齡陰雲回於素蓋悲風動其扶輪  
臨埏闔以歔歔淚流射而霑巾

祭文

愚曰哀辭祭文皆誄之流孔門諸弟子廬墓而  
已徐孺子生芻拜墓而已情真意篤文可也不

文亦  
可也

弔賈誼文

庾闡

晉書本傳闡字仲初潁川鄆陵人

中興二十三載余忝守衡南鼓棹三江路次巴陵望君  
山而過洞庭涉湘川而觀汨水臨賈生投書之川慨以  
永懷矣及造長沙觀其遺象喟然有感乃弔之云

偉哉蘭生而芳玉產而絜陽葩熙冰寒松負雪莫邪挺  
鍔天驥汗血苟云其雋誰與比傑是以高明倬茂獨發  
奇秀道率天真不議世疾煥乎若望舒耀景而焯羣星  
矯乎若翔鸞拊翼而逸宇宙也飛榮洛汭擢潁山東質

清浮磬聲若孤桐琅琅其璞巖巖其峯信道居正而以  
天下為公方駕逸步不以曲路期通是以張高弦悲聲  
激柱落清唱未和而桑濮代作雖有惠音莫過韶濩雖  
有騰鱗終仆一壑嗚呼大庭既邈玄風悠緬皇道不以  
智隆上德不以仁顯三五親譽其軌可仰而標霸功雖  
逸其塗可翼而闡悲矣先生何命之蹇懷寶如玉而生  
運之淺昔咎繇謨虞呂尚歸昌德協充符乃應帝王夷  
吾相桓漢登蕭張草廬三顧臭若蘭芳是以道隱則蠖

屈數盛則鳳覩若棲不擇木翔非九五雖曰玉折雋才  
何補夫心非死灰智必存形形託神川故能全生奈何  
蘭膏揚芳漢庭擢景飈風獨喪厥明悠悠太素存亡一  
指道來斯通世往斯圯吾哀其生未見其死敢不敬弔  
寄之淶水

祭橋公文

魏武帝

故太尉橋公懿德高軌汎愛博容國念明訓士思令謨

幽靈潛翳總哉緬矣操以幼年逮升堂室特以頑質見  
納君子增榮益觀皆由獎勗猶仲尼稱不如顏淵李生  
厚歎賈復士死知己懷此無忘又承從容約誓之言徂  
沒之後路有經由不以斗酒隻雞過相沃醑車過三步  
腹痛勿怨雖臨時戲笑之言非至親之篤好何肯為此  
辭哉懷舊惟顧念之悽愴奉命東征屯次鄉里北望貴  
土乃心陵墓栽致薄奠公其享之

祭程氏妹文

陶潛

維晉義熙三年五月甲辰程氏妹服制再周淵明以少  
牢之奠俛而酌之嗚呼哀哉寒往暑來日月寢踈梁塵  
委積庭草荒蕪寥寥空室哀哀遺孤肴觴虛奠人逝焉  
如誰無兄弟人亦同生嗟我與爾特百常情慈妣早世  
時尚孺嬰我年二六爾纔九齡愛從靡識撫髻相成咨  
爾令妹有德有操靖共鮮言聞善則樂能正能和惟友  
惟孝行止中閨可象可倣我聞為善慶自己蹈彼倉何

偏而不斯報昔在江陵重罹天罰兄弟索居乖隔楚越  
伊我與爾百哀是切黯黯高雲蕭蕭冬月白雲掩晨長  
風悲節感惟崩號興言泣血尋念平昔觸事未遠書疏  
猶存遺孤滿眼如何一往終天不返寂寂高堂何時復  
踐藐藐孤如曷依曷恃煢煢避魂誰主誰祀奈何程妹  
於此永已死如有知相見蒿里嗚呼哀哉

祭仲弟文

陶潛

歲在辛亥月惟仲秋旬有九日從弟敬遠卜辰云寔永寧  
右土感平生之游處悲一往之不返情惻惻以摧心淚愍  
愍而盈眼乃以園果時醪祖其將行嗚呼哀哉於鑠吾弟  
有操有槩孝發幼齡友自天愛少思寡欲靡執靡介後已  
先人臨財思惠心遺得失情不依世其色能溫其言則厲  
樂勝朋高好是文藝遙遙帝鄉爰感竒心絕粒委務考槃  
山陰淙淙在宗切水聲也懸溜曖曖荒林晨採上藥夕閒素琴曰  
仁者壽竊獨信之如何斯言徒能見欺年甫過立奄與世



辭長歸蒿里邈無還期惟我與爾匪但親友父則同生母

則從

繼

母

爾雅曰母之姊妹為從母

相及齧齒

齧與亂義同毀齒也家語曰男子八歲而亂齧

音條亂

音襯

並罹偏咎

靖節年三十七母孟氏卒是偏咎為失怙也

斯情實深斯愛

實厚念疇昔日同房之歡冬無緼褐夏渴瓢簞相將以道

相開以顏豈不多乏忽忘饑寒余嘗學仕纏綿人事流

浪無成懼負素志斂策歸來爾知我意常願攜手寘彼

衆意每憶有秋我將其刈與汝偕行舫舟同濟三宿水

濱樂飲川界靜月澄高温風始逝撫杯而言物久人脆

奈何吾弟先我離世事不可尋思亦何極日徂月流寒暑代息死生異方存亡有域候晨永歸指塗載陟呱呱遺稚未能正言哀哀孀人寡婦也禮儀孔閑庭樹如故齋宇廓然孰云敬遠何時復還余惟人斯昧茲近情著龜有吉制我祖行望旒翩翩執筆涕盈神其有知昭余中誠嗚呼哀哉

自祭文

東坡曰淵明自祭文出妙語於  
蟪蛄息之餘豈涉死生之流哉

陶潛

此文乃靖節  
之妙筆也

歲惟丁卯律中無射天寒夜長風氣蕭索

瑟

陶子將辭

逆旅之館永歸於本宅故人悽其相悲同祖行於今夕  
羞以嘉蔬薦以清酌候顏已冥聆音愈漠嗚呼哀哉茫  
茫大塊悠悠高旻是生萬物余得為人自余為人逢運  
之貧簞瓢屢罄絺綌冬陳含歡谷汲行歌負薪翳翳柴  
門事我宵晨春秋代謝有務中園載耘載耔迺育迺繁  
欣以素牘和以七弦冬曝其日夏濯其泉勤靡餘勞心  
有常閒樂天委分以至百年惟此百年夫人愛之懼彼

無成惕日惜時存為世珍沒亦見思嗟我獨邁曾是異  
茲寵非已榮涅豈吾緇捽兀窮廬酣飲賦詩識運知命  
疇能罔眷余今斯化可以無恨壽涉百齡身慕肥遁從  
老得終奚所復戀寒暑逾邁亡既異存外姻晨來良友  
宵奔葬之中野以安其魂宵宵我行蕭蕭墓門奢侈宋  
臣儉笑王孫廓兮已滅慨焉已遐不封不樹日月遂過  
匪貴前譽孰重後歌人生實難死如之何嗚呼哀哉

文選補遺卷三十九

欽定四庫全書

文選補遺卷四十

元 陳仁子 輯

碑

愚曰古廟有碑本以繫牲今碑有文乃以紀事甚者封岱鐫功磨厓勒頌其去古遠矣

漢樊毅修西岳廟碑

衛覲

山經曰泰華之山削成四方其高五千仞廣十里周禮職方氏華謂之西岳祭視三公者以其能興雲雨產萬

物通精氣有益於人則祀之故帝舜受堯歷數親自巡省設五鼎之柴燎埋玉致敬神祇又用昭明百穀繁殖黎民時雍鳥獸率舞鳳凰來儀暨周末之有改也其德休明則有禎祥荒淫臊穢篤災必降秦違其典璧遺瀉

池

史記秦本紀始皇使者從關東夜過華陰平舒道有人持璧遮使者曰為吾遺瀉池君

二世以

亡高祖應運禮遵陶唐祭則獲福奕世克昌亡新滔逆鬼神不享建武之初彗掃頑凶更率舊章敢用玄牡牲牲又充天惟純佑萬國以康光和二年有漢元舅五侯

之胄諱陽之孫曰樊府君諱毅字仲德承考讓國家于  
河南究職州郡辟公府除防東長中都令誅彊豪撫瘠  
民民郡以清命守斯邦威降秋霜恩踰冬日景化既宣  
猶復夕惕惟圭祿之報順民之則孟冬十月齋祀西岳  
以傳舍窄狹不足處尊卑廟舍舊久牆屋傾亞世室不  
修春秋作譏特命行事荀班與縣令先謹以漸補治設  
中外館圖珍琦畫怪獸岳瀆之精所出禎秀役不干時  
而功已著甞勞久逸神永有憑自古泰山邱邑猶存五

嶽同尊哀此庶民獨不賴福乃上復十里內工商農賈  
賦克厭帝心嘉瑞仍倫風雨應起濺潤品物君舉必書  
況乃盛德惠及神人可無述焉於是功曹郭敏主簿魏  
襲戶曹史診禮等遂刊玄石銘勒鴻勛垂曜含靈軫存  
有識其詞曰

二儀剖判清濁始分陽凝成山陰積為川扶泰摧否洪  
波汜臻堯命伯禹決江開汶川靈既定恩覆兆民乃刊  
祀典辨于羣臣因瀆祭地岳以配天世主遵修永享歷



年赤銳煌煌受茲介福京夏密清殊俗賓服令問不違  
可謂至德德音孔昭實惟我后出自中興大漢之舅本  
枝惟百延慶長久俾守西嶽遵奉神祀改傳飾靈則有  
攸濟降瑞翕祚景風凱悌惟風及雨成我稷黍俊民用  
章康乂室宇勒銘紀頌克配梁甫

漢故金城守殷君碑

衛覲

君諱華字叔時上郡定陽人大匠君之子也其先出自

有殷因國定氏不改其號聖哲玄流至君而懿幼膺瓊

蘭之美長有冲邈之志敦詩說禮韜

芳袁切玉篇韜韜也

韜徒木切玉

篇曰弓衣也韜也

竹貴誕循前業守以恪恭仕歷州郡忠諤有

聞其大操也眈眈虎視龍變不羈故雄傑於并域聲班

於上京察州孝廉貢除郎中左馮翊丞協宣文物公事

州舉茂才宛丘令崇行寬猛示之禮禁哀延庠校政以

惠和三載陟勛臨金城郡障羌虜避難遷移役兼民匱

室如懸罄乃敷權略獎厲威信儼抗率服不敢窺踰兵

戰而時動因省獵以習儀興利弭患順其所樂開通狹  
道造作傳館吏士咸悅不勞而勸是以搢紳之徒譚講  
雅誦釋軍旅之犀革陳俎豆於泮宮旌顯才良咨量三  
壽賞罰不僭邦場寧靜歲時豐登耆叟擊壤童齒謳謠  
功庸顯列當升寵祚天不慙遺

王篇曰慙且也傷也閑也魚僅切毛詩不慙遺

一老慙傷也

景命失靈以光和元年九月乙酉卒官生有嘉

休終則鼎銘於是故吏邊竺江英韓緒等追送遐邱刊

石勒勛其辭曰

於惟明后懷德握芬昆台之耀秀出不羣文昭有毅武  
烈能仁含舒憲墨以育生民垂紀東壤西國著勛身沒  
名流載世常存古之遺老非此孰云于爾臣思續其臭  
芬

西嶽華山亭碑

衛覬

惟光和元年歲在戊子名曰咸池季冬己巳弘農太守  
河南府君諱毅字仲德下車之初恭肅神祠西嶽至尊

詔書奉祠躬親自往省徒勞謙即事有漸散齊華亭齋  
室逼窄郡縣官屬清齋無處尊卑錯綜精成不固畏天  
之威逢斯瘴怒時雨不興甘澍弗布念存黔首懼闕曠  
素於是與令已都胸臆先謹公謀圖議繕故斷度捫廊  
立室累處左右趨之莫不競慕二年正月己卯興就既  
成休嘉啓寤各得竭情福祿是顧刻茲碑號吏卒俠路  
其辭曰

巖巖西嶽五鎮次宗序德之尊大華優隆皇帝永思祀

典孔明高神肯宴珪璧贄通赫赫在上以畜萬邦惟嶽  
降神寔生羣公卿士百辟纘業攸蒙帝命不違歲事報  
功羣后命卿散齋外亭敬恭明祀以奉皇靈處所逼窄  
屑窳有聲神樂其靜修暈無形尊卑有序潔心致誠因  
繕舊室整頓端平在其版屋孰不加精天人同道萬祚  
來迎既受帝祉延于後生為龍為光顯又王庭為公為  
侯福祿來成刻石紀號永亨利貞

府丞勃海劉固叔長  
功曹史楊儒曼先主

簿楊旭伯馮功曹掾楊基伯載史浹許禮文化縣丞隴  
西彭和伯怡左尉隴西甄璆叔曼監典者門下掾駱瑗

伯先主記史伯覽文進戶曹掾衛嘗長史田翬  
文祖將作掾曹鑒孔明任就幼成史吳武丙昌

魯相顏午乞復顏氏开官氏繇發碑

後漢桓帝時

鍾繇書

惟永壽二年青龍在涖灘霜月之靈皇極之日魯相河  
南京顏君惟大古華胥生皇維顏誕育至寶宰制元道  
百王不改孔子近聖為漢定道自天王以下至于初學  
莫不顙思嘆仰師鏡顏氏聖舅家居魯里开官聖妃在  
安樂里聖族之親禮所宜異復顏氏开官氏邑中繇發

以尊孔心念聖歷世禮樂陵遲秦項作亂不尊圖書倍

道畔位離敗聖輿食糧

闕

亡于沙丘君於是造立禮

器樂之音符鐘磬瑟鼓雷洗觴觚爵鹿俎桓遵

闕

禁

脩飾宅廟更作二輿朝車威熹宣杼玄汙以注水流法  
舊不煩備而不奢上合紫臺稽之中和下合聖制事得  
禮儀於是四方士仁聞君風耀敬詠其德尊其大人之  
意卓彌之思乃共立表石紀傳億載其文曰

虧統華胥承天畫卦顏育空桑孔

闕

元孝俱祖紫宮大



一所授前閭九頭以升言教後制百王獲麟未吐制不  
空作承天之語乾元以來三九之載八皇三代至孔乃  
備聖人不世期五百載三陽吐圖二陰出讖制作之義  
以俟知與於穆韓君獨見天意復聖之族遠越紀思修  
造禮樂瑚璉器用存古舊宇慇懃宅廟朝車威熹出誠  
造闕不水解工不爭賈深除玄汙水通闕注禮器升

堂天雨降澍百姓訥和舉國蒙慶神靈祐誠竭敬之報  
天雨厥福永享年壽上極闕旁及皇代刊石表銘與

乾輝耀長期蕩蕩於盛復授赫赫罔窮聲垂億載

微在生手

空桑之地今名孔竇充國也

### 西嶽華山堂闕碑

張昶

易曰天地定位山澤通氣然山莫尊於嶽澤莫盛於瀆  
山嶽有五而華處其一瀆有四而河在其數其靈也至

矣聖人廢興必有其應故岱山石立中宗繼統

西漢睦孟傳孝

昭元鳳三年正月泰山萊蕪山南徇徇有數千人聲民視之有大石自立高丈五尺大四十八圍入地深八尺

三石為足劉向傳孝昭帝時冠石立於泰山

大華授壁秦胡絕緒

史記秦本紀始皇使

者從闕東夜過華陰平舒道有人持壁遮使者曰為吾遺瀉池君因言曰今年祖龍死

使白魚入舟

姬武建業

史記周本紀武王東觀兵至于盟津渡河中有流白魚躍入王舟中武王俯取以祭既渡有

大自上復于下至于王屋流為烏東漢馬融曰魚者介鱗之物兵象也白者商家之正色言商之兵衆興周之象也西漢董仲舒策曰白魚躍入王舟有火流於王屋化為烏寶珪出水子朝喪位

左氏

昭公二十四年十月癸酉王子朝以成周之寶圭湛于河幾以獲神助甲戌津人得之河上陰不佞取將賈之

則為石云布五方則處其西列三條則居其中若廣袤奇怪

山經有紀矣是以帝王巡狩親五嶽而告至覲方后而

考禮故經有望秩之禋典有生殖之祀蓋所以宗山川而報功也四海一統天子秉其禮諸侯力政強國攝其祭其奉邑曰華陰也久矣乃紀於禹貢而分秦晉之境鄙晉之西則曰陰晉邊秦之東則曰寧秦邑既遷徙禮亦如之三國力爭以奉此祭其城險之固基址猶存故老之言未墮於民也逮至大漢受命克亂不愆不忘舊名是復率禮不越故祀是尊歷葉增修虔恭又備一禱三祀終歲而四以迄于今而世宗又經集靈之宮於其

下想松喬之壽是遊是憩郡國方士自遠而至者充巖  
塞厓鄉邑巫覡宗祀乎其中者盈谷溢谿咸有浮飄之  
志悅愉之色必雲霄之路可升而越繁昌之福可降而  
致也地不愛寶黃玉自出令德所興必先廢之故殷宗  
周宣以衰致盛卿相是毓匪惟崧高降生申甫斯亦有  
焉是時也王業中缺大化陵遲郡縣既毀財匱禮乏宗  
廟傾壞壇場蕪穢祭祀之禮頗有闕焉於是鎮遠將軍  
領北地太守閔鄉亭侯段君諱煨字忠明自武威占北

土憑託河華二靈是興故能以昭烈之德享上將之尊  
銜命持國重屯斯寄討叛柔服威懷是示羣凶既除郡  
縣集寧家給人足戶有樂生之歡朝釋西顧之慮而懷  
關中之恃雖昔蕭相輔佐之功功冠羣后弗以加也遂  
解甲休士陳而不戰以其逸力修飾享廟壇場之位地  
荒而復辟禮廢而復興又造祠堂表以參闕建神路之  
端首觀壯麗乎孔徹然後師旅祈請既有常處雖雨霑  
衣而禮不廢於是邑之士女咸曰宜之乃建碑刊石垂

示後裔其辭曰

於穆堂闕堂闕昭明經之營之不日而成匪奢匪儉惟德是程匪豐匪約唯禮是榮虔恭禋祀黍稷芳馨神其醉止降福穰穰

曹娥碑

博平邯鄲淳

孝女曹娥者上虞曹盱之女也其先與周同祖末曹荒沈爰茲遁居盱能撫節按歌嬖娖樂神以漢安二年五

月時迎伍君逆濤而上為水所淹不得其屍時娥年十四號慕思盱哀吟澤畔旬有七日遂自投江以死經五日抱父屍出漢安迄于元嘉元年青龍在辛卯莫之有

表度尚設祭誄之辭曰

東漢孝女曹娥者會稽上虞人也父盱能絃歌為巫祝漢安二

年五月五日於縣江沂濤迎娶娉神溺死不得屍骸娥年十四乃沿江啼哭晝夜不絕聲旬有七日遂投江而

死至元嘉元年縣長度尚改葬娥於江南道傍為立碑焉

伊惟孝女騰騰之姿偏其

返而令色孔儀窈窕淑女巧笑倩兮宜其家室在治之陽待禮未施嗟喪慈父彼蒼伊何無父孰怙訴神告哀



赴江永號視死如歸是以眇然輕絕投入沙泥翩翩孝

女載沈載浮或泊洲嶼或在中流或趨湍瀨或逐波濤

章懷太子註曰娥投衣於水祝曰父屍所在衣當沈衣隨流至一處而沈娥遂隨衣而沒千夫失聲

悼痛萬餘觀者填道雲集路衢泣淚掩涕驚動國都是

以哀姜哭市杞崩城隅或有剋面斃

里之切廣韻曰斃剋也

耳引

鏡用刀坐臺待水抱樹而燒於戲孝女德茂此儔何者

大國防禮自修豈沉庶賤露屋草茅不扶自直不斷自

雕越梁過宋比之有殊哀此貞厲千載不渝嗚呼哀哉

亂曰

名勒金石質之乾坤歲數歷祀立廟起墳光于后土顯  
昭天人生賤死貴利之義門何悵華落雕零早分葩豔  
窈窕永世配神若堯二女為湘夫人時效髣髴以詔後

昆

漢議郎蔡邕聞之來觀夜以手摸其文而讀之邕題其碑陰曰黃絹幼婦外孫齊曰又云二百年後碑冢

當墮不墮逢王巨步平二年八月十五日記之勾章令滿騫○會稽典錄曰上虞長度尚弟子邯鄲淳字子禮時甫弱冠而有異才尚先使魏朗作曹娥碑文成未出會朗見尚尚與之飲宴而子禮方至督酒尚問朗碑文成未朗辭不才因試使子禮為之操筆而成無所點定朗嗟歎不暇遂毀其草其後蔡邕又題八字曰黃絹幼

婦外孫齋曰○愚曰碑刻自先秦漢晉而下遺佚散亡者多矣岫嶠禹碑有其形而亡其辭嶧山秦碑有其辭而非其正沈峴山充斲石蒼蘚剝蝕周鼎幹棄者何限觀歐陽氏集古錄趙德夫金石錄蒐獵收拾若梁鵠書魏大饗碑之類十存一二而又有毀於兵厄於火世不得盡見者余生晚後學慙鼠獄智乏難碑窮卷又缺博洽之士甚欲輟梁宋迹燕秦摩挲斷蘚訪問琬琰而目疾繼之姑以篋中所藏一二碑刻附刊卷末好古博雅相與廣覽搜求以裨遺缺使後人獲見秦漢諸儒之筆德至渥也

## 祝文

### 告天地羣神文

愚曰光武興漢與武王興周一也其義正其心公可以白之天地神

明而無愧帝辛暴虐神怒人怨孟津之師真足以舒神人之憤當時武成所載祝祠嚴毅直曰

有道曾孫周王發千載讀之莫敢議其非而況其時皇天后土實聞斯言者歟莽之僭暴又浮於紂光武心謙讓而義公正非若後世曹馬輩篡竊飾辭以欺天者吾故標之以與武王告天之辭

共讀

漢光武

建武元年春正月諸將議上尊號馬武先進曰天下無主如有聖人承敝而起

雖仲尼為相孫子為將猶恐無能有並反水不收後悔無及大王雖執謙退奈宗廟社稷何宜且還薊即尊位乃議征伐今此誰賊而馳驚擊之乎光武驚曰何將軍出是言可斬也武曰諸將盡然光武使出曉之乃引軍還至薊夏四月公孫述自稱天子光武從薊還過范陽命收葬吏士至中山諸將復上奏曰漢道王莽宗廟廢絕豪傑憤怒兆人塗炭王

與伯升首舉義兵更始因其資以據帝位而不能奉承大統敗亂綱紀盜賊日多羣生危蹙大王初征昆陽王莽自潰後拔邯鄲北州弭定三分天下而有其二跨州據土帶甲百萬言武力則莫之敢抗論文德則無所與辭臣聞帝王不可以久曠天命不可以謚拒惟大王以社稷為計萬姓為心光武又不聽行到南平棘諸將復固請之光武曰寇賊未平四面受敵何遽欲正號位乎諸將且出耿純進曰天下士大夫捐親戚棄土壤從大王於矢石之間者其計固望其攀龍鱗附鳳翼以成其所志耳今功業既定天人亦應而大王留時逆衆不正號位純恐士大夫望絕計窮則有去歸之思無為久自苦也大衆一散難可復合時不可留衆不可逆純言甚誠切光武深感曰吾將思之行至鄴光武先至長安

時同舍生彊華自臨中奉赤伏符曰劉秀發  
兵捕不道四夷雲集龍圖野四七之際火為  
主羣臣因復奏曰受命之符人應為大萬里  
合信不議同情周之白魚曷足比焉今上無  
天子海內淆亂符瑞之應昭然著聞宜答天  
神以塞羣望光武於是命有司設壇場於鄜  
南千秋亭五成陌六月己未即帝位  
燔柴告天祗于六宗望於羣神祝曰

皇天上帝后土神祇眷顧降命屬秀黎元為人父母

屬音

燭

秀不敢當羣下百辟不謀同辭咸曰王莽篡位秀發  
憤興兵破王尋王邑於昆陽誅王郎銅馬於河北平定  
天下海內蒙恩上當天地之心下為元元所歸識記曰

劉秀發兵捕不道邠金修德為天子

邠金劉字也春秋演孔圖曰邠金刀

名為赤帝後次代周○劉歆曰注檢班固傳注為下合有一劉字

秀猶固辭至于再至

于三羣下僉曰皇天大命不可稽留敢不敬承

愚按南史永初元年夏六月丁卯宋武帝即位於南郊設壇柴燎告天曰皇帝臣裕敢用玄牡昭告于皇皇后帝晉以卜世告終歷數有歸欽若景運以命于裕夫樹君宰世天下為公德充帝王樂推攸集越俶唐虞降暨漢魏靡不以上哲格文祖元勳陟帝位故能大拯黔首垂訓無窮晉自東遷四維不振宰輔焉依為日已久難棘隆安禍成元興遂至帝主遷播宗祀湮滅裕雖地非齊晉眾無一旅仰憤時難俯悼橫流投袂一起則皇祀剋復及危而能持顛而能扶姦究具殲僭偽亦滅誠興廢有期否終有數至于大造晉室撥亂濟時因藉時來

欽定四庫全書

大遼補遺  
卷四十

十四

真尸具重加以死作慕義重誥牙庾正勇尸墜后月才  
教至乃三靈垂象山川告祥人神協祉歲月滋著是以  
羣公卿士億兆夷人僉曰皇靈降鑒於上晉朝歟誠於  
下天命不可以久淹宸極不可以暫曠遂遍羣議恭茲  
大禮猥以寡德託于兆人之上雖仰威天畏畧是小節  
顧慙永懷祗懼若實敬簡元日升壇受禪告類上帝用  
酬萬國之情克隆天保永祚于有宋惟明靈是饗讀此  
文見宋武帝矜誇勞績援引興辭上則欺天下則欺人  
畧無漢文東嚮南嚮再三遜讓之意人不可欺也天可  
欺乎劉宋短祚其不獲追躡劉漢者信哉因附見下方  
(一)此編始以國家詔令終以天  
地祀文皆鉅典也豈徒云乎哉

文選補遺卷四十